

福建通志

第肆拾陸冊

共壹百冊

福建金石志卷十四

石十三

明一

方井石刻

在霞浦

洪武中

若要重開除是龍來

馮志云在霞浦縣洪武中知縣尹昌隆重浚得刻石云云

雙鯉瀨刻石

永樂初

與銀河通

永泰縣志云在赤岸水尾篆書鐫與銀河通四字無年月姓名故老相傳爲永樂初林廷選書或云吳彥清書漫漶不可辨識沃以水始得讀惟與字及銀字偏旁尙完善

雪峰崇聖禪寺碑文記

在侯官

宣德八年

永樂十七年冬予奉使閩粵登覽雪峰之勝適值住持遠芷號秋崖開整

新徑轉偏隘爲弘深由萬工池以達山門浚池建橋撤舊更新規模壯觀
經始之時予適至寺衆僧歡躍以改作吉祥之應予亦喜其山林清蔓因
留信宿芷公乃從容謂曰茲山來自武夷延袤聯絡歷數百里以至於此
乃巍然高聳削拔層空蓋閩地多燠冬罕霜雪惟茲山勢接剛風氣候倅
於中土冬常積雪故名雪峰唐眞覺祖師駐錫於此創建梵宮歷年旣久
屢興屢廢今 聖天子興崇佛教凡名山古跡皆葺而新之僧錄以雪峰

名利非戒行老成者不足以當興復之任乃於永樂二年詢謀僉請以前
欽選住泉州大開元寺潔菴映禪師來主斯席師姓洪氏名正映號潔
菴世居江右之金谿自幼托跡沙門不茹葷羶受具足戒於杭之昭慶寺
得法於靈谷巽中禪師遠芷亦江右臨川人因得隨侍嗣法分葺玄沙而
登山之日殿堂門廡俱爲瓦礫荆榛師卽慨然感嘆奮志興復誓不下山
寒暑一衲脇不沾席是故八閩崇敬四衆皈依積糧于廩伐木于山陶瓦
甃而儲器用越五年佛殿成又明年法堂三門同日創建弘碩雄偉視舊

有加肖像端嚴金碧輝煥於以上祝 聖壽下祈民福功德之大不可思議一旦師諭遠芷曰汝興復玄沙功業已竟茲山創置大體固具然廊廡僧堂尚未周完予年已衰邁欲歸老靈谷非汝不足以繼吾志遂移檄僧錄於永樂十六年以遠芷升代師任夙夜惟謹猶不敢忘其付囑凡所未備者悉爲成之復按茲寺創始於真覺其示寂之際預留識云石塔卯爆杉枝拂地叢竹筍生五百年後吾當再來至潔菴登山適五百二年諸識俱驗如合符節况師顏貌又與真覺無異故人咸以師爲再來之真覺也此固不可以無記願賜一言勒諸貞珉用垂不朽予惟佛氏之興肇蹟已遠其教以持戒守律爲初地以明心見性爲實際學其學者勞形苦志困悴山林宴坐默存求底於常樂常住不生不滅之域又何與於寺之輪奐焉然象教之設大衆瞻仰人心之感先乎目之所見觀殿宇之巍巍像設之嚴肅則敬心悚焉而生敬心生則萬善由是而積自漢以來教日益滋寺日益盛至於唐宋閒有推沮排抑欲廢其教者誠以盈虛消息皆係乎

數有形則有數惟法無形固不囿乎數佛與僧寺皆有形者豈免於數乎姑以此寺言之自真覺至於正映纔五百餘年興廢不知其幾至是果應識而大興者豈非真覺能知乎數而預爲張本乎自小世界至三千大千世界乃至無量無數微塵刹土皆始於成而終於空終則復始展轉循環無有窮已一切有爲之法亦復如是而有無始成無住無壞無空者存試觀乎寺今旣成矣而汝又住其中矣其壞其空寧保於後日乎雖然誠能盡汝今日成住之責必堅必確使無速朽吾爲汝記俾汝後之法嗣厥子若孫因吾之言思紹汝志繼而葺之使不致于屢壞屢空是亦汝與汝師常住乎中也芷曰唯唯遂書以爲記

資善大夫行在禮部尙書毘陵胡濙撰文

奉政大夫翰林院學士兼左春坊大學士廬陵胡廣篆額

賜進士徵仕郎行在刑科給事中三山姚銑書丹

宣德八年歲在癸丑二月前任當山遠芷同當代住持良琛立石

案見雪峰志

重建道原堂碑

在漳州

成化四年

漳州治城之西北有臺屹然曰臨漳實據溪山之勝宋紹熙庚戌紫陽朱夫子守是邦登茲臺而愛之欲築讀書之室不果寶慶乙酉郡守危楨始做白鹿洞規築龍江書院于臺之下成夫子之志也淳祐丙午郡守方來復於書院之東偏構堂三楹肖夫子之像于其中配以高弟北溪陳安卿每歲春秋率庶僚暨邦之羣彥祀焉而顏其堂曰道原蓋取夫子與北溪授受之語也其後邦人復以勉齋黃直卿祔食于堂蓋勉齋亦閩人且嘗講道夫子之門者也迨宋社既屋書院燬于兵遺址歸浮屠氏惟堂巋然故處歷歲既久屢圯屢葺然規制隘陋宋棟欹摧有識者憫焉成化四年春正月福建按察司僉事臨江周君守謨行部至漳祇謁遺像周覽慨然顧謂知府英山王文同知舒城胡珉推官南城江白曰昔之思召伯者不忍伐其所芟之棠思萊公者不忍傷其所植之柏茲堂實朱子之明靈攸

棟非植物比也傾圯若是是固爲政者之過予司憲諸君守臣也弗亟圖之安所諉其責皆應曰諾相與捐俸以圖新之於是僦良匠斬美材礮堅礎十日而興役焉君又爲度其面勢之宜且節縮廩餐以助其費爲堂五間其崇三尋有奇旁爲兩齋以處游學者前爲三門以謹啟閉肇役于是月丙戌至三月朔乃訖功焉像設有嚴繪飾維煥郡之長貳率諸生暨鄉之薦紳用少牢于堂以告成事焉

案見何文肅文集

福寧節孝祠碑

成化八年

元福寧州尹王公諱伯顏字伯敬霑化人也起家宣使爲祁陽令調烏程以循良稱遷信州推官數辨冤獄所全活者甚衆至正九年以大臣論薦擢朝列大夫福寧州尹至之日黜奸吏誅元豪覈賦籍均徭役修學宮以教諸生建禮殿以祀先聖福寧翕然稱治尋陞福建轉運副使會盜起徐蔡蔓延及閩羣兇相煽爲變漸迫州境民留公不得行公乃築壘門募民

兵守之嚴候望謹烽燧賊不敢犯十二年秋賊陷寧德掠羅源勢益張冬十一月賊與建寇合兵來寇公遣巡檢阮完澤率兵出禦之而命千戶嚴伯顏不花主簿陳文積守西門完澤遇賊于古縣戰敗死之嚴陳懼不敵開門先遁賊突入公聞之亟帥親兵迎戰連鬪數合不利遂被執賊帥坐州治召公詰之公掀髯歷階而升賊叱曰強盜猶作態耶公罵曰汝本販鹽盜縣官何負於汝而反顧謂我爲盜耶賊怒叱之跪公兩手據地不爲動賊益怒令撻之公詬曰吾爲天子吏頭可斷身不可撻遂死於東門之外立而受刃血出白如乳民哀之哭聲連巷明日賊執公仲子相及其婦潘至相罵曰吾父已死吾豈苟生者何不速殺我當爲鬼以滅賊耳賊忿其言引出斬之潘有殊色賊欲汙之時潘產未彌月不可近乃閉之空室不食數日而死寇退民歛公權厝于郭東之佛宇明年公長子楨負公遺骸歸葬行臺御史余公闕以其事聞命立祠學宮之右而以相與潘侑食焉元末祠燬于火成化壬辰秋八月予行部至福寧耆民林慈等相率請

復公祠予因出西門觀公與賊戰處古木樵樛寒烟蒼然溪流瀟瀟有悲咽聲慨然太息想見公之爲人乃以廢佛宇曰般若庵者爲公祠命縣丞劉福介葺其弊陋加之圯墁前爲三門旁爲兩廡繞以高墉塑公之像于中以相配之而置潘之像于東廡懼瀆也經始於是月甲戌落成於是歲冬十月辛未扁其祠曰節孝

案見何文肅文集

小西湖題字

在莆田

小西湖

閩部疏云興化城中有水從西來堰之立石紀小西湖三字字適而有韻太守岳季方筆也岳以閣臣出守故能破文法行已意然亦被謗書彭惠安郡人也力明其無他僅得致仕

案岳正字季方潮縣人正統十三年會元出知興化府築隄溉田數千頃

五泉題字 在莆田

仁泉

馮志云莆有五泉一日仁泉在壺山蟬井之左數武石壁上刻仁泉二字岳正書在永福寺左大旱不竭

頌德亭記殘石 在侯官 成化間

重建頌德亭碑記 賜進士觀戶部政雲程林玘撰文 賜進士奉訓大

夫戶部郎中還珠王俊篆額 賜進士口德郎兵部主事鳳池趙明書丹

福州西關故有亭名光遠元至正初年閩人爲閩海道肅政廉訪司副使

中順公寶哥畏兀氏建去思碑亭口尋爲去思亭今易爲接恩之亭口去

思亭而西又口亭曰西隱更名頌德相傳爲郡守唐扶而更扶唐人治郡

愛民有循吏風後遷觀察使政有口攷是亭蓋吾閩人思扶爲守之時而

更也逮國初郡守劉君信重修歲久傾圯成化丙申夏雲閒唐侯來守吾

福以正律已以德化民首飾學舍口明古靈陳先生之教家賜而人諭之

以下

西安塘

在寧德

弘治十年

登龍

馮志云在寧德縣弘治十年水漲金溪山墩崩去半中有兩石相合摧流其一更一尙存中刻二字曰登龍字徑方五寸

在惠安

小山

閩書云五公山北麓有小山皇朝張襄惠岳讀書焉襄惠刻石曰小山

衍案明史岳字維喬正德十二年進士官至湖廣總督

王文成時雨堂碑

在上杭

正德十二年

正德丁丑三月奉

命平漳寇駐軍上杭旱甚禱於行臺雨日夜民以爲未足迺四月戊午班師雨明日又雨又明日大雨農乃出田登城南之樓以觀民大悅有司請名行臺之堂爲時雨且曰民苦於盜久又重以旱謂將靡遺今始去兵革之役而大雨適降所謂王師若時雨今皆有焉請以志其實嗚呼民惟稼穡德惟雨惟天陰隲惟皇克憲惟將士用命効力去其莠蠹惟乃有司實耨穫之以庶克有秋乃予何德之有而敢叨其功然而樂民之樂亦不容於無紀也巡撫都御史王守仁書是日叅政陳策僉事胡璉至自班師

墨池詩刻

在侯官

嘉靖中

來戍閩南宅此山一泓伴我日清閒太平兵刃何嘗淬且蘸詩豪向水閒竹閒十日話云不署名代以來戍閩南語考之知爲豐熙題按熙嘉靖

初謫戍閩中館湖上薛氏家

鳳池東川盧公墓志銘

在福州

嘉靖三十八年

賜進士第中順大夫浙江杭州府知府前戶部郎中海州陳柯撰文

鄉進士奉訓大夫雲南石屏州知州東浦何文□書丹

鄉進士廣東高州府吳川縣□教諭松坡齊□行篆額

曩余寄□京師署戶部郎佳與新興少尹石泉盧公善既奉職守杭君時

致政旋閩爲東川公敦葬事走□徵余銘余惟盧榕巨族也於余家世通

好石泉公祖姑實余太祖妣也余既知君兼以世誼□□□遂敘而銘

之敘曰公諱密字汝靜號東川姓盧氏先世范陽人也始祖敬夫宋孝宗

□爲郡焉敬夫子廷瑞仕至宣叅徙居□道公□□□十二世孫也六世

祖道□貞孝先生元末舉進士徙鳳池家焉高祖伯和曾祖景純隱德弗

□祖彥澤考廷器俱由□經擢賢科母楊氏成化戊子二月十八未時生

公於曲江官舍公幼性慧力學弱冠補邑庠弟子員志行不苟同遊賢達

咸推重之正德初齊坑曾祖墳被富強旁侵營葬族衆懼弗敢敵公毅然
曰殺身成仁彼何人邪遂□□身訟于官勢孤見窒經歲繫獄侍御王
公至爲親訊委官到山口地若干東至□□石直抵山脊西至溪口大路
南至山坑北至朱家祖墓驗山溪原係景純公開鑿至今猶爲行道口碑
事明富強抵法毀塚公志得□□□蕩盡矣孝子高公惟一景純公外
孫也雅道公賢謂祖墳微公極力必轉□他姓矣嗟夫公行爲若此宜其
篤生令子翊邑聲弘盪寇詰奸勲烈表世公之世口將自是久而彌昌也
夫公卒于嘉靖丁酉五月初一日寅時享年七十娶王氏左叅政王公英
女太僕少卿祿之妹也佐內甚賢先公三年卒享年六十有五嘉靖戊戌
仲冬十有四日與公合葬齊坑公子鴻卽新興少尹也娶朱氏繼南氏女
姑適義山黃氏口源孫男應元應魁應科應選公以舊葬地溼嘉靖戊午
十一月十一日卽本地遷而上之石泉公與朱南壽域統耐焉
銘曰逝者云云不往者存旣濬其源口流必長吁嗟盧公惟善之敦我銘

斯文以俟其後昆

明嘉靖己未仲春吉旦將仕郎廣東新興縣主簿男鴻泣血立石

芝山葉世隆刻

竹間十日話云明東川盧公墓志銘已被石工磨礮字形約略可辨錄其文云云盧公戊午改葬至己未立石銘石未納壙中明矣王英正統壬戌進士侯官人王祿字正夫成化壬辰進士

俞大猷立石

在漳州

宋鄭虎臣殺賈似道于此

案在漳州城南二十里

鴻漸山石刻

在南安

海上視師

南安縣志云在鴻漸山明郡守程秀民勒

案秀民字天毓西安州人嘉靖壬辰進士任泉州府知府海寇阮其寶

林翦毛等屢掠同安秀民大戰蕩平之登石井墩臺刻石紀之

鹽政刻石記

在泉州

權天下之鹽以資財計其法至本朝周盡簡便矣而閩中之法尤爲便閩中有八郡耳下四郡皆瀕海鹽所從產其得以法行鹽於其地者上四郡也行法之地法不行則鹽不售鹽不售則商不通商不通則課爲之虧而財計匱乏之病必及於國故必有禁戒之令偵捕之科以絕民間之私行者而以法行鬻之鹽始得不滯而其所從產之方非法之所行也於令甲未嘗設爲禁戒而偵捕吏兵自以徼候非常不爲鹺政置也今乃不用於徼候而每以其偵捕之威施於鬻鹽者舟牛之任載匹夫匹婦之負擔往往皆見執拘民愚不習於法不知其所鬻之不當得執而駭於吏兵輒出財賂之而後得免其不能具賂則棄其所任載負擔以去而以鹽與吏兵耳夫所謂緣法爲虐者猶有禁戒之令直於輕重多寡之間託倚以爲低昂如於法不得以舟載者而譏及乎牛任不得以牛任者而譏及乎人荷

雖其作奸起暴尚寄於可援之條是也今鹽之所轉徙水浮則用舟楫陸行則引牛馬而匹夫匹婦之負擔不能以幾於此乎產於此乎鬻第轉之於淖漉荒鹵之濱而致之市落山谷亦何以異乎蔬果穀粟之行於民間而鬻此者空以鹺名橫被譏求是下自爲法也民苦此久矣比者余栢坡公以按察僉事分巡是邦戢橫刷奸聰明旁燭而司徒新山顧公以重德高年爲一方著蔡部使者至郡必禮其廬以資政俗之得失顧公乃以民之苦爲告余公爲慨然出禁於是載任負販之家曉然知其所鬻之物之不當得執無畏於譏求偵捕吏兵亦洒然濯去昔日爲暴之心而無所覲於此也已而方西川公來爲郡晉江邑侯朱肅菴君亦繼至敬事愛民推行尤慎於是鹽之鬻於民間無異果蔬穀粟之通行流布而無所害此鹽轉徙必集於新橋浯溪之渡近渡居民常資以爲生其黨王憲達羅德靜甚私司徒公之德羣來涕泣以請曰顧公已矣吾等不忍忘相與尸祝之於家而尤願一言以記於石政俗安玩之久事之不出於法而爲民病者